

20/11/2001

Mahadzir berang dituduh pembohong

SETIAUSAHA Parlimen Kementerian Pendidikan, Datuk Mahadzir Mohd Khir, 'melenting' apabila dituduh sebagai pembohong oleh seorang ahli Parlimen pembangkang di Dewan Rakyat, semalam.

Kejadian itu berlaku apabila beliau menjawab soalan Dr Syed Azman Syed Ahmad (Pas-Kuala Terengganu) yang mendakwa beliau berbohong ketika menjawab soalan mengenai pembabitan Puteri Umno dalam aktiviti di institusi pengajian tinggi awam (IPTA) dan sekolah kerajaan.

Beliau yang tidak puas hati dengan dakwaan itu merayu kepada Yang Dipertua Dewan Rakyat, Tun Dr Mohamed Zahir Ismail, supaya memerintahkan Syed Azman menarik balik kenyataannya itu.

"Saya nak minta satu saja Yang Dipertua, supaya Yang Berhormat Kuala Terengganu tarik balik kenyataannya yang mengatakan saya berbohong kerana saya beri jawapan saya dan saya tidak berbohong.

"Jadi saya pohon, Yang Dipertua, agar Yang Berhormat Kuala Terengganu tarik balik apa yang dia sebut tadi. Saya tidak pernah berbohong apatah lagi dalam bulan Ramadan. Saya belum jawab lagi pun dia sudah kata saya berbohong," katanya.

Terdahulu, Dr Syed Azman dalam soalan tambahannya mendakwa sama ada Mahadzir tidak tahu menahu atau berbohong dalam Parlimen mengenai kegiatan Puteri Umno dalam program 'Kakak Angkat - Adik Angkat' di sekolah di Pulau Pinang, selain pembabitan seorang pelajar Universiti Teknologi Mara, Shah Alam (UiTM) sebagai penolong bendahari pergerakan itu.

Mahathir berkata, pihaknya akan menyiasat mengenai perkara itu, manakala dalam kes membabitkan pelajar UiTM dalam pergerakan Puteri Umno, beliau berkata pihaknya tidak tahu menahu mengenai perkara itu.

"Jika ada membabitkan kegiatan Puteri Umno, kadangkala ada ahli pergerakan itu yang juga terbabit dengan pertubuhan bukan kerajaan (NGO) dan mereka ini turut adakan kegiatan seperti kem motivasi dan sebagainya.

"Soalannya, mereka ini menganjurkan program itu bukan atas nama Umno, tetapi bagi pihak kerajaan, jadi perkara itu tidak timbul," katanya.

Mahadzir sebaliknya mencadangkan Syed Azman yang begitu prihatin dengan segala kegiatan Puteri Umno, menyertai Umno jika ingin tahu lebih lanjut mengenai segala kegiatan pergerakan itu.

Katanya, pihak Kementerian Pendidikan selama ini tidak pernah membenarkan mana-mana parti politik menjalankan sebarang kegiatan bercorak politik di kampus IPTA.

"Selain itu, kementerian juga tidak membenarkan murid sekolah kerajaan terbabit dengan parti politik, seperti dinyatakan dalam Peraturan 7, Peraturan-peraturan Pelajaran, Disiplin Sekolah 1959 dan Ordinan Pelajaran 1957," katanya.

(END)